

TNC 55-77/3917(3)  
5475

宋蒙泉文集

22775

3



候選光祿寺典簿周府君墓志銘



往居里中時讀書中書封文別業中書與先君子同自  
出也因于賓坐中識其姻家故城周府君興子府君年  
六十餘容貌甚壯坐上坐連引大白與少年角浩落  
落然無世俗齷齪態予心識其為人也又十餘年府君  
孫衍曾介其舅懋嘉乞予銘府君之墓蓋距其卒逾三  
年而封文下世亦已久矣按周之先世居當塗之采石  
鎮永樂中徙民實畿甸而周氏居故城始祖思誠數傳  
至南大司馬世選為隆萬間名臣沒賜特祠司馬生邑  
學生震、生承芳崇禎庚午舉人風流文雅與吾州德

水泰雲諸先生為詩酒之交是為府君曾祖諱勳邑庠生考諱章成附監生妣賈孺人府君七歲而孤依賈孺人以長以慈以孝人無間言于時內外間波搖颺豎交錯紛紜府君以幼歲支撐門戶彌縫鎮定克以就寧人以為難既席世業性復仁厚每戚友有所請必給其需歲饑出粟千百石以活鄉人名聞于上至于花朝月夕延賓命酒必極醉乃罷令文某者與府君交覬得厚賄然事出于非義弗之應俄以細故興獄牽連以撼府君費數千百緡旁觀皆憤惋不平而府君處之坦然不以累其懷抱其為善于鄉如故其飲酒亦如故也此可

以見其為人矣府君諱麟徵字興子例授光祿寺典簿卒年七十有八元配劉氏長沙守承家女繼配陳氏子繩祖早卒孫衍曾貢生曾孫肇慶肇祥曾孫女一以乾隆十五年十一月望日合葬府君于劉孺人墓實祖塋之次銘曰

與古為徒而厚厥德與天為徒而游厥域與造物者為徒而此焉息

陝西平羅縣知縣巽夫李君墓志銘

君姓李氏諱于益字巽夫先世出徽之婺源而遷於蘓  
曾祖諱霆祖諱文科以仲子勦貴貶贈父諱勗字子武  
母氏繼母吳氏生君一人李氏之先世有隱德贈公  
在蘓時仲子方八歲讀書塾中時德州孫書臺先生罷  
長洲令聞其聲而識之乞以嗣其長子贈公因以北遷  
遂為德州人後仲子舉解首入翰林歷官數十年文章  
節行動天下士君子所稱孫莪山先生者也贈公既北  
遷子武公留依外家其後雖往來南北而率居於南故  
君自少至長及受室皆在江南君資稟清異讀書聰敏

入籍德州補博士弟子員旋食餼子武公卒時君尚幼  
繼母在堂家無恒產君以故時、南還為俯仰計不大  
獲寧居以其暇治舉子業為名諸生康熙庚子舉山東  
鄉試冠其本房莪山先生以君早孤所以隱恤之者甚  
至君亦自勉勵幸有所成就既數試禮部不利而莪山  
先生亦致仕歸君每對客拊髀慨然而嘆、老之將及  
而時之不我待也乃儆裝謁選人需次當得邑令時雍  
正庚戌辛亥間方釐鹽務凡權場之吏皆以士人為之  
君用是往粵東粵中饒裕鹽筴之利不慮無所出釐奸  
除蠹而已君故優為之鹽使者庶其才移之司庫先是

君所歷皆在大海中天水冥蒙風濤震蕩君亦安之及  
移省城職事之暇有友朋詩酒之樂教幼子讀書學文  
章荏冉數年若忘其官之卑也秩滿遷平羅令既抵官  
察其風土審其習俗數月之間將有所舉置未幾以他  
事罷歸、頗置田宅為終焉之計遂不復出焉君之歸  
也閉關却掃不與聞外事獨與同好四五人遞相過置  
酒為歡以娛老而已後值起用之例或勸北上謝不應  
人以為知止也君生康熙 年 月 日卒乾隆  
年 月 日得年六十有 先娶 氏生子今蘓繼娶  
謝氏側室子今萬 副貢生孫 孫女 人以乾隆

年 月 日 葬君於城東南 里 阡從子武公之  
兆贈公北遷後生季子、將公及吾母太安人君視予  
外兄弟也故予宜志君之墓君少而食貧比罷官歸雖  
小康然亦僅爾時峩山先生子孫往、不能自振人或  
議君不竭力給之然使悉君所有不過少延日月與之  
同盡而已卒無所益故以此議君者予獨有以明其不  
然銘曰  
才有弗遇藉之筦庫不卑小官亦行其素歸歟歸歟以  
娛我暮志此幽宮維君之墓

儀矩李君墓志銘

儀矩李君之喪予既哭于其家已而其孫鏞鈇請藏幽  
之詞君視予行輩較長而交最深且久銘君者宜莫予  
若也君諱庭燦儀矩其字號肖亭又曰仰亭晚年自稱  
頑禪老人考諱棟康熙庚辰進士以庶吉士改官中書  
祖考諱源順治丙戌進士山西河津令曾祖考諱誠明  
萬歷甲午舉人有高行嘗築矩亭隱焉世所稱泰雲先  
生者也中書公典試貴州卒于道君時尚少妣劉孺人  
又卒依長兄以居兄沒始出應當世務李氏自泰雲先  
生以來皆喜交游尚意氣地當南北之衝士大夫道此

者多歸李氏故君幼而習焉所居故有見可園四清館  
君葺其屋宇益植嘉卉每花晨月夕親朋萃止命酒徵  
歌觥籌交錯雖窮晝夜不少倦天性通諧樂易不為拘  
拘態雖齒輦相懸者時相與詼嘲親狎人樂近之四方  
縞紵之贈輪鞅交集握手言歡一見如故遠近莫不知  
有李肖亭者君亦故樂此不為疲也例授州同知銜嘗  
因保舉引見以殘疾罷幼時讀書不肯竟其業頗能  
稱說古人事多識鄉閭舊聞言論娓娓四坐傾聽其後  
耆宿零落考故事者于君徵焉嘗重建矩亭于見可園  
故自謂肖亭其擅園池之勝賓酒之樂者垂三十年嘗

南走吳越為維揚姑蘓西湖之游以暢其懷抱每里中  
有事州大夫就謀焉陳說輒中竅故往為長吏所重  
君雖天賦彊固精神滿腹然亦不大自愛惜頑禪老人  
云者頑言其堅禪不繫也晚年數病已如故要其生  
平勝情豪舉灑脫不滯亦不可謂無過人者矣君卒年  
六十有七娶曹氏景州贈奉政大夫曰序女以婦德稱  
能襄君之內政男子一衡均太學生前卒女子二遠趙  
飛運蘓訓孫男子二鏞貢生欽庠生曾孫女子五鏞欽  
卜以乾隆二十四年己卯二月日舉柩合葬于城東  
齊家莊之兆乃銘之曰

匪石之磴匪蠶之縛面目有真曲謹曷託最君生平風  
流如昨足以豪矣永安靈魄

勅授文林郎前鹿邑知縣顏樂清墓志銘

乾隆己卯季夏聞吾友樂清之訃驚嘆悼怛為位而哭  
又為詩以寄哀比秋其弟介子至握手而泣已乃出所  
狀樂清文學行誼政事之詳以授予曰良朋故知零落  
殆盡銘吾兄者非子而誰嗚呼予何忍辭樂清諱懋倫

別字清谷 復聖顏子六十九世孫高祖前河間太守

贈光祿卿賡明公曾祖贈中大夫孝靖先生祖中大夫

河東運使澹園公考贈文林郎明經公諱妣孔孺

人鄉謚貞懿自考以上節誼德望炳于史冊傳于海內  
詳載顏氏家乘樂清幼有至性十二歲喪父哀毀如成



人孔孺人卧病經年延醫侍疾恒不解帶疾間輒就塾問業七歲誦四子書日千餘言九歲受易詩書三經父喪既闋益讀禮記左氏學為古文慕韓子為時文愛其家學山先生初從嶧縣李小東太史已更數師莫不嘆其穎敏刻厲有任重致遠之志為詩與從兄幼客齊名里中有二顏之目已與諸詩人稱吟社八子而樂清幼客固秀出一時矣性好賓客四方至者假館授餐遇狂簡不得志之士有加焉晉江何琦嗜學有文怪僻不可近錢塘金農有才名遠來納交皆館于家琦病瘡三四月農被惡疾卧累月飲食藥餌二子忘其為客焉年二

十為博士弟子以臨雍恩當得州同知辭不就戊申拔貢太學癸丑授四氏學教授魯中學者咸慶得師乙卯以博學鴻詞徵蓋十餘年以來既卒業諸經益講明于修己治人之道遂馳驟前史潛究宋賢之書及一切天文地理兵刑錢穀之術莫不涉獵提要鉤元淹通罔滯淵乎沛然大放厥詞是時山東僅舉四人而樂清名在第二其一牛大令運震其二今劉中丞藻耿教授賢舉也丙辰試不見收以覃恩授文林郎贈父官封母孺人次年薦卓異以母老乞近地辛酉擢河南鹿邑令鹿故大邑界連九縣俗悍多盜至則嚴保甲治猾

後抑豪右杜苞苴政次第舉邑連歲被水患既具牘告  
災乃徧履田畝夜行深潦中屢蹈不測或無所得食切  
切為民請命大府諭監司監司諭郡守俾以偏災聞樂  
清持前議甚堅曰等失官耳目擊此露處積淖者于心  
忍乎郡守戚振驚然之得賑如例及  
詔勘報災不  
實者獨免于議積荒之後稽逋賦治賑務以其間浚惠  
濟明黑諸河以通積水邑以有秋孔孺人頻年卧疾願  
靳子請告曰汝既乞近地今又告是避艱也賑務竣乃  
移疾歸在鹿五年不私官一錢屢遭災荒拯救如在己  
移疾後至稱貸成行質田以償所負既居母憂喪葬悉

準於禮無毫髮憾服闋赴豫待補屢署滑縣裕州泌陽  
皆有政聲靳人謝鳳王者逆案餘黨與子弟潛居泌界  
因挾保甲獲之密聞於守：喜促移郡獄大府以聞

詔令嚴鞫而囚斃無以為詞乃坐泌陽令初鞫不實  
以免守因代守任過不置辯用是改臨邑教諭自此倦  
遊不出矣樂清少孤有一弟一妹友愛篤至妹適魏氏  
資裝極厚又分產給之弟即介子嗣于仲父依兄以立  
雖析居每為合產之議既數生子不育乃撫弟子崇穆  
為衆子且約立其長崇柝為嫡子及病亟遂如其言殆  
亦幾之先見然衆謂斯人不當遽亡也樂清卒以六月

八日距生康熙甲申年五十有六娶孔氏上猶知縣毓  
蕙女封孺人嗣子崇柝庠生次崇移女二字孔繼洸孔  
毓灼以 年 月 日葬于 樂清有詩十餘卷皆  
手輯其可以傳世者其他著述介子亦以次收拾其卒  
也鄉人私謚為文博先生予與樂清同貢太學而交最  
深且久其生平善行不勝志、其大者乃咨嗟太息而  
銘之曰  
嗚呼樂清性醇而德粹業富而文明篤于天親以及友  
生進為民之母而退為鄉之型有敝者形不朽者名嗚  
呼樂清宜無憾于九京

歲貢生亦堂李君墓志銘

吾州與予善交者莫如李秋厓秋厓學問沉奧性情孤  
介於人少所許可顧屢稱其從父亦堂李君之學與其  
為人予少遊於外而李君常閉戶不交外人故不數晤  
然而聞諸人言恒斷、若不足於君者予甚疑之乾隆  
甲戌夏秋厓遽卒予方排纂山左詩選每追念生平撫  
卷流涕乙亥歸里秋厓弟右居以君所著亦堂漫草示  
予評選已又持君從子悟金所為狀請為君藏幽之詞  
予乃披覽遺文因以夷考其行質諸往日秋厓之言作  
而嘆曰嗟夫士之處世欲理于口不其難哉君為陽山

令諱元璠之子芮城令諱浹之孫僉憲公諱允楨之曾  
孫生於世族稟質清穎少勤於學偶出應童子試則中  
童子試自是入則讀書出則求友良辰佳夕舟車道路  
皆手一編吟諷不輟間有題咏藏之篋笥其後北遊太  
學與四方英彥編摩考稽聞見益廣倦遊歸里遂閉關  
却掃簡於酬應蒔花種竹之餘好習靜獨坐外間或目  
為怪捃摭指摘之來因不免矣君七歲失母事父及繼  
母孝父初之官君與兄留家去任所五千里往省無虛  
歲及父罷官歸遽令別居定省無虛朝夕君父未歸時  
兄孝廉君卒君事寡嫂撫孤姪勤懇篤至得金每為予

言其始末未嘗不流涕君之別居也有間君者君父笑  
曰某但知埋首陳編與一二讀書同好飲酒賦詩商畧  
古今耳如汝所言彼不諳亦不屑矣間者愧而止君又  
不諳生計或粗衣糲食能淡泊自甘不以見諸詞色傷  
父之心及兄弟析產於田宅財賄一切不較惟檢閱先  
世遺書競々收藏勿失晚年善病一榻呻吟不廢書史  
其詩曰呻吟集間為古文筆致高逸蓋君之為人大畧  
如此君諱萊字北山號亦堂歲貢生嘗以修書勞議叙  
州同知取同州張某女持家勤儉婦職克修中歲而  
卒子男子一人丙賁取田氏俱早卒女子二人適張孚

襄蕭煥丙賁有子振甲未冠而夭乃以悟金子僧提為  
嗣君生於康熙癸亥十一月初七日卒於乾隆甲戌九  
月二十六日張孺人生于康熙 年 月 日卒於某  
年月日以乾隆二十年某月日與君合葬祖塋之次予  
前里居時好因舊聞詢軼事嘗憶秋厓之言一過亦堂  
與君對坐論文今年春猶及撫秋厓之棺臨穴一慟於  
悟金之請其忍不銘之曰  
士各有志孰能詭隨少有異人每為世譏悠々之口亦  
孔之醜我寧作我於汝何有最君生平讀書自好不以  
雌黃移我特操厭俗徵逐守厥清淨以此始終亦何云

病秋厓之言徵之有年勿諛以誣慰君九原

澧州知州趙公墓志銘

誥封文林郎直隸澧州知州趙公諱念曾字根矩號漱  
陽澧陽者勞山之奧區公嘗游焉愛其勝也故以自號  
少有遠志神宇清峻不與俗伍能文章工詩其才可以  
汎及餘事尤有至性骨月朋友間肫如也當雍正改元  
天子勵精為治旁羅俊異取士無方而公與同里李  
君寶默起布衣被特簡居官稱職以能遷擢可不謂殊  
遇哉先是士籍太學者歲於吏部試第甲乙為銓次然  
試者率以人代歲在丁未試既竣詔吏部以才者見於  
是冒名者皆斥而授見者八人為邑令公與李君與焉

初知湖南華容縣移沅陵有軍功擢澧州牧三任職而  
一遷官卒於澧州華容故濱湖：隄壞則田不治下車  
視之曰是可緩耶申府請修築身先吏民工竣瀕湖皆  
成沃壤其在沅贖驛卒盜賣之田以省民累緹索於  
險灘以便行舟其在澧修澧陽橋民頌德焉所至興舉  
類如此公勇於為義惡不善尤嚴見不義者斥絕不遺  
餘力人往：憚之其官華容獄中以鬼告為牒諭之立  
止沅俗奉白帝奸民緣以為利導引募化舉國若狂公  
出行遇之駐馬詢其故立毀其鹵簿投像於河譴其長  
老而為之禁俗以衰止澧人尤信鬼事五通神獲利弗

均則構訟于是乃以治沅者治之碎厥木偶民大駭乃  
曉以正義反覆開譬漸以革心焉公少為博士弟子以  
善病故入太學時以文章與諸名士角數應制舉無所  
遇及為邑興文教修庠序擇諸生親教之一時彬彬然  
稱趙門弟子顧長於吏治在沅值黔苗變軍興旁午從  
容應之事集而民不擾時有官船北去人疑令以家避  
皆大恐公聞故之遣兩幼子出署嬉民遂安郡守李珣  
嘗屬以獄訊得情矣守故苛不已遽移牒求去守謝乃  
視事他日問曰輿論謂我何對曰公當自問耳內省無  
愆何恤人言蓋強毅不撓其天性也幼失怙恃依伯兄

金華太守以長金華公善詩受業新城王司寇以其學授公及伯之金華公家居忽心動亟往省至則疾作矣奉侍湯藥衣不解帶百餘日遭喪慟絕扶襯而還及仲兄孝廉病事之如事伯兩兄既卒乃慨然有四方志亦際遇一時起家為州縣不可謂不遇在官皆有政績然不大顯不得竟其施也公既卒李君亦罷官歸矣先此陝西咸陽人始祖諱得榮洪武時遷德州世襲錦衣衛指揮副使曾祖都察院右都御史兼戶部侍郎諱繼鼎封資政大夫賜祭葬祖順天通判諱啟睿封承德郎考官監生諱廷講祖考皆贈中憲大夫公生康熙丁巳四

月二十五日卒乾隆辛酉十月十六日年六十有五以丙辰 覃恩封文林郎配于氏并氏皆孺人于孺人前卒葬於城南黃河厓祖塋之北并孺人生子三人耘經崇經大經皆庠生女三人適羅以深蕭炳蘇顛孫六人孫女三人耘經兄弟卜以乾隆十四年十月三日葬公於于孺人之墓而屬弼為銘辭弼少時嘗侍先君子與於文酒之歡公察其可教獨舉詩之微旨告之他人不聞也先君子嘗被疾手足木強公與徐先生敬菴日夕省視曰君無患我能起君乃處方劑治藥餌暇則鼓琴奕棋如是三月不怠卒以無恙公赴澧時嘗拜公於家



其後耘經兄弟出公遺像種桂圖屬弼題其左對之悽  
然泣下盖公愛諸子之才期其後且昌大故績圖示意  
也因題小詩勗其承公之志今銘公墓能無慨乎乃為  
銘曰  
謂公不遇有特達知謂公遇矣而未竟其施理官若家  
以無尤疵疾惡之嚴為百世師開佳城兮公之居士厚  
水深兮桂樹以滋昌百世兮始基之

東阿訓導律翁張先生墓志銘

先生姓張氏諱方載字幼渠晚號律翁平原世家也張  
氏自方伯公以進士起家科第不絕先生自幼以文學  
有名獨偃蹇無所遇克歲貢生官訓導引年歸、數年  
而卒先生繼室予姊也始予幼時歲、過姊家是時先  
生為名諸生久矣先生貌頎而長修髯數十莖軒、然  
無俗狀讀書博通文筆高潔邁其曹偶自子弟鄉里之  
秀皆受學焉論交於外同學無敢相先者如是盖四五  
十年已卯之後俛得復失自是學益老文益高名益振  
而遇益艱遊於門者往、獲雋叔子予介亦登進士而

先生遂老矣先生之東阿時予祖道焉戊辰冬往省先生值其病庚午哭其喪以先生之學術文章宜登諸廊廟為儒林之光顧終身不得志僅博一官以卒豈不可惜乎雖然先生無憾也士大夫之家傳世既久鮮有令聞先生家世厚德及身而行益修孝弟之美為鄉里矜式讀古人書發為文章成一家言尤善歌詩為名流所稱許其於文尚先正不驚時趣雖卒不遇食其報於子有五子五女皆見其成立年過古稀壽考令終天之於先生可謂厚矣先生又何憾焉張氏先世為濟南王舍人莊人遷平原曾祖諱國柱萬歷庚戌進士官陝西布

政使祖諱完臣順治乙未進士國子監助教需次主事考諱扶康熙乙卯舉人內閣中書舍人母董氏贈左都御史董公女先生兄弟五人而次居二伯兄方晉康熙癸酉舉人其令山西先生實助之為理及子介令新陽奉先生訓為治以是得其民先生之康熙丙辰六月十八日卒乾隆庚午八月二十三日年七十又五元配董孺人同邑季問先生女即贈公孫女也有婦德生康熙戊午三月五日卒癸巳十二月二十四日繼室予姊先贈儒林公長女子五人長予覺歲貢生次予靖次予介雍正甲辰舉人乾隆丙辰進士江南新陽縣知縣次予

又廩膳生次予治己卯科舉人女五人適田開朱理訓  
董絜金紹藩孫曾遴覺靖介及女適田朱者董出又治  
與三女我之 出治又予壻也孫五人孫女四人曾孫  
一人曾孫女一人以 年 月 日葬於城東北祖塋  
之後與董孺人合葬予治省予京師乞銘辭予惟先生  
生平文而不貴故舉斯義以銘之曰是為平原律翁先  
生之墳式固且安昌子與孫利及後昆

謝五郎生誌

五郎名紫芝字商隱小字白駒號竹巖又號松泉姓謝  
氏曼倩明經父也方山比部大父也比部繼清義公後  
蔭藉高華願能以詩自顯又兀傲不諧于俗漁洋山人  
所云歷落嶮崎可笑人也明經雅有父風為漁洋所喜  
每與比部書輒及曼倩曼倩云實取田司農仲女生五  
郎五郎既生比部大喜以書走新城告漁洋漁洋亦喜  
則錫以名若字與小字故人群呼五郎白駒而不知其  
小字爾五郎小時英、有奇氣九歲而孤俄比部亦卒  
母田夫人教之嚴然以小年涉世故嗜好嘗之不能無

所動然忼爽不齷齪悟輒棄去鄙夷財利玩易炎涼其  
英敏時、見眉額間迄今年五十每變益自斂飭鍊削  
融鍊往、為俗所詬厲然所造深矣性頗傲不能俯仰  
隨人雖刻意熨貼然猶不諧于俗其才氣鬱勃無所用  
故寄之豪素技能之間無不超妙過人始比部淹博群  
籍藏書甚富五郎少失學深以為恨故愛近文士以自  
砥厲及求故所藏書則為人乘間攘竊者過半矣其餘  
猶三萬卷整次排比為霞綺樓以貯之又輯族譜以貽  
後人于是倘佯林野涉歷場圃將與農夫野老為儔而  
豈昔之五郎哉然漁洋之命之久矣五郎常病已得不

死既自治棺槨因擇墓田樹松柏為終焉之計勒石其  
前曰五郎墓而自叙生平俾余為之誌余謂五郎誠太  
早計雖然余惡知忘死者之幾死而蘄生者之幾生耶  
又惡知夫死而稱者之不為生之憾耶五十之前等之  
逝水五十之後任之造物仲長統有云逍遙一世之上  
睥睨天地之間不受當時之責永保性命之期是可以  
誌五郎耳矣

榆村張先生墓表

乾隆丙子秋榆村先生終于魚臺學會既歸葬其孫廷  
案請予文以表于墓予之得侍也久知先生有德而能  
文章及其高風逸致微案請固將書而傳之先生諱元  
字殿傳榆村其號先世自棗強遷淄川八傳至儀部公  
敬登進士第學博文鉅為淄邑人文開先子少保公至  
發功在綸扉業著國史于是張氏為巨族少保弟中發  
隱居不仕嘗從李少崖講學鄉人稱碩隱先生子諱泰  
瑞以諸生死土寇之難罵賊不屈妻譚媳高同時就義  
所謂一門三烈者也子詢康熙壬子拔貢寧陽教諭是

為先生祖父諱永濟辛卯舉人文行為邑中矜式配韓  
孺人生二子先生其長先生事親致孝居喪盡禮事繼  
母丁孺人撫兩弟克堯教孤姪儀謀終身純篤人無間  
言先生之于文章本天性守家訓生平師法具有淵源  
少從同邑畢公權譚眉樵兩先生遊為文不趨時好故  
其遇較晚先舅孫峩山先生深有推許而已山王檢討  
為序以行世詩古文詞學于族父崑崙山人山人以文  
章雄長齊魯間嘗從漁洋司寇遊故先生于詩亦漸于  
漁洋之傳其後學益老文益工自成一家諸老之後歸  
然為耆宿焉碩隱善大書先生得其法骨力蒼勁有雲

鶴遊天之槩尤善教人及門多所就造盧澹園守永平  
延之敬勝書院文風丕變科名蔚起是時先生年將八  
十矣及澹園轉運天津從予得漁洋感舊集為之補傳  
考訂商確先生實司其事其著述不倦如此先生昔客  
吾州先後十年每論文既罷掩關獨坐然鐙披覽中宵  
就睡五鼓輒起率以為常花辰月夕酒閒多述前聞源  
源本：予嘗與坐每幸聞所未聞嘗上春官侵晨過友  
人索飲：稍酣僕促入場竟不赴送友人喪值春月望  
遠村桃花盛開信步往觀已復逐所望而行遂迷歸路  
寺僧留之宿次日乃返性情灑落澹于世味亦可見矣

予每見先生不覺形神俱肅穆然如對古人自先生下  
世每為學者言其學有本源醇古之行尤近今所鮮嗚  
呼先生雖不可作其有不亡者存矣先生之卒以九月  
二十二日年八十有五雍正丙午科舉人授魚臺教諭  
娶劉氏婦德母儀為宗黨所稱前八年卒子作礪增廣  
生作哲雍正乙卯舉人臨朐教諭皆前卒作賓附學生  
女一適太學生高恭緒孫廷鈞廷銘廷鐸廷錫廷霖廷  
叙廷桂廷策廷箴鈞銘叙策皆邑諸生案乾隆癸酉拔  
貢生曾孫 人 作哲與予同拔貢于學使王公故  
予于先生為年家子廷霖則作哲子也系以銘曰

金玉其德彬郁其文外和中粹抱樸含真德惟典型文  
曰耆宿康強逢吉孫曾益茂一官寄耳不朽者名刊斯  
貞石騰實飛聲鳳凰之原鍾靈藏魄曰文先生千年斯  
宅

無鋒居士墓表

吾州士大夫之族李氏有三而稱南李者為大前明嘉  
靖中方伯公逢時以進士起家至山西左布政使三傳  
為贈公嗣美生左江道允禎以仲子侍郎公濤貴兩世  
皆贈通奉大夫侍郎兄浹順治丙戌進士知芮城縣封  
奉政大夫子元璠歷官松江知府百餘年間衣冠相繼  
可謂盛矣蓋有世德焉松江公長子諱蕃字介公別號  
無鋒居士天性孝友居母陳宜人憂父老矣于哀毀骨  
立中曲盡孝養素病胃氣力疾定省松江公安焉嘗以  
譖見怒批其頰跪受而不辯俄悟其譖名慰居士而罪



諧者居士為叩頭求解乃已耽詩及琴撫絃動操有遺世之音詩取寄興而已頗以教仲子國柱然不欲以為名孤懷淡對不事聲華非意相干者未嘗與較蒔花竹蓄魚鳥閉戶自得古高士風早歲餽于庠以例貢成均當得官恥于營求遂不仕疾既亟戒家人勿修佛事延名師授幼子業命諸子居內廂而以前後廳舍與季弟配趙孺人一守其訓孺人家世名族與李氏相埒松江公之終居士病方劇孺人哀痛之餘理喪儀奉湯藥皆得其宜已遭居士喪竭力治葬事值歲歉遂落其產弗恤也季弟以所居售于人僅存數楹孺人泣語國柱

俾復其遺址曰是先公所營神猶依焉不可棄也教國柱兄弟親師取友不暇以辭色卒成名士不負居士之訓孺人之卒距居士三十年國柱既襄葬事乃屬予為文以表于墓蓋居士之卒國柱方幼穉其伯兄肇曾亦卒當時志墓之詞無復省記大惧居士之德之湮沒不彰也然所狀以視予者皆孺人所嘗稱說什得一二云爾昔之志于墓中者固不止此國柱以拔貢第一入成均文名籍甚其弟國弼亦登賢書人皆知其將繼先世之盛而不知居士所以承先而啟後者誠無愧其世德也故畧其行誼之概以表之曰是為吾州無鋒居士李

君之墓城陰河東鬱、宰樹同穴爰藏神物是護德潛  
光幽來世所慕貞石不泐以識厥處

皇清勅贈儒林郎翰林院編修顯考秋圃府君暨

勅封安人顯妣李氏行述

先府君姓宋氏諱來會字清遠一字清源號秋圃先世

來自山西長子縣五傳至侍郎公諱性明洪武初歲貢

生歷官刑部右侍郎肖像鄉賢祠為鄉賢之首見一統

志及明史夏原吉傳長子諱於高隱不仕見州前志隱

逸志又四傳教授公諱默是為府君高祖曾祖諱儒純

增廣生祖諱炳前壬午舉人由文安知縣行取歷刑部

郎中修大清律遷肅州兵備道按察司僉事考諱兆李

康熙丙寅拔貢生官郟城教諭贈儒林郎翰林院編修

妣李氏庠生諱嗣賢女贈太安人府君生而穎異幼稟  
家學與顏先生振玉同游孫莪山先生門先生目為顏  
宋然尤心異府君故先母李安人歸焉即先生本生胞  
妹也年十八先王父膺選拔府君亦以第一入學時督  
學為泰州宮定山先生府君內奉父師之訓外與賢士  
大夫游學日益進名亦日益著方伯猗氏衛公督學崑  
山徐公先後興起白雪書院儀封張清恪公建濟寧書  
院府君皆與焉三公皆當時賢者其器重府君略同最  
後北平黃公督學山左于時府君方游江西而王父為  
學官進見時首詢府君所在命專使促歸蓋公之作士

視前尤盛深以不得府君為憾故也比至合六郡之士  
而校之果冠曹偶公既重王父之德又嘉府君學行遇  
待逾尋常迄今三十四年府君至京師謁公於家不孝  
爾亦時侍左右每便坐道舊事未嘗不咨嗟太息於王  
父及府君之不遇也王父篤於德業不問家人產府君  
歲授生徒盡獻所有而不私及抵郟邑時先曾生王母  
在堂而仲姑一家隨之官舍先叔父及季姑頻年婚嫁  
食衆費繁府君拮据以承親志不給則質先母簪珥衣  
服以助率以為常先母未嘗有恠色焉迨王父以艱去  
官旋卒於郟府君一身奔走扶櫬而北無半畝之居升

斗之儲勞瘁經營以奉先王母嗣是屢游於外脩脯稍  
餘輒封題之曰葬費示雖窘乏不忍故友愛叔父猶篤  
自奉養王母及喪與葬不以一毫累叔父叔父即世則  
命不孝輩力營殯塋不待其孤之請也先伯祖居鄉晚  
年貧困歲數過必留數十日奉事惟謹雍正甲辰歲  
大饑迎養伯祖母於家而分給從叔以活時霖雨逾兩  
月河水汎濫遠趙氏姑府君長妹也携家十餘口徑至  
就食薪米騰貴日市以給先母率家人承府君之意終  
無怠色王父論文崇經術法先正與莪山先生相為唱  
和故府君於文事所得最深指授後學亦惟先民是程

不驚時趨早年及聞王阮亭司寇趙秋谷宮贊論詩得  
其淵源所作古體詩尤多合近體為四卷制藝二百餘  
篇亦手訂為數卷交游南北間示友生若徐晝堂侍讀  
儲理質編修陶穉衷太常梁薌林太宰諸先生及浙楚  
同游諸君子具有評隲不孝輩謹守之以俟行世生平

喜讀異書購不能得即手寫之皆作蠅頭小楷或行書  
篋中常有十餘種嘗別擇古人論詩之言參以所聞王  
趙諸公論說為論詩微言於說經諸書錄其論之醇者  
束以己意為讀書知新日記皆近在京師所纂著也府  
君秉質剛直與人誠篤見不善義形于色論事侃々不

少回曲然亦未嘗忤物友朋交好皆有始終數年在京  
師薊林先生雖位通顯過寓欵洽不異昔時書法學二  
王參以董文敏筆意為時所貴重嗜茗及酒愛花竹尤  
喜菰菊故號菊圃晚乃更號秋圃癸卯楚游還茶陵彭  
石源夫子拔貢成均甲辰主本州書院丁未後往還浙  
江壬子歸家乃舉三喪襄事先塋蓋前此數游以甘旨  
不足大事未舉不遑寧處之故自是教授里中不復出  
焉乙丑春不孝彌成進士改庶吉士府君屢寄手示諭  
以君恩祖澤諄々勗勵已聞府君病亟請迎養既抵  
京師病旋愈戊辰五月姪岱齡始舉子府君聞之喜命

歸省視置酒相對縷々說家中事二十三日午後覺左  
脇微悶飲酒就寢五鼓而嗽作宿痰湧上頓至不起嗚  
呼慟哉府君素豁達於事無芥蒂岱齡之歸神色殊悽  
愴顧而嘆曰獨恨不得見幼孫耳家人侍側頗恠語之  
不祥顧起居飲食如故未敢妄意及此孰謂竟成永訣  
耶嗚呼慟哉

先母姓李氏考諱文科贈朝議大夫通政使司右叅議  
妣張氏贈太恭人李氏世為長洲人贈公以子通叅公  
勦嗣于孫氏因遷德州先母其次女也幼而端莊明敏  
異凡女之紅之事寓目即工讀書通大義為父母所愛

年十六歸先府君善事舅姑嫻于禮而加敏能無違事  
王父家貧先母服習勞苦左右奉養家有饋遺皆以獻  
舅姑王父以為知禮尤心重焉從宦于郟與府君承順  
親志實有同心晨昏定省之外供衣服治中饋酒肴菹  
醢之屬王母一以見委無不精潔得宜雖勞不辭也王  
父性方嚴動循禮法然每事經先母料理則稱善者十  
八九在郟十餘年裁縫不委工人澣熨不付嫗婢至於  
羹湯餅餌必先母手製以上非是則不甘事先曾生王  
母尤得歡心一家之中自叔母仲姑下逮僕婢無不悅  
且服者時有匱乏輒出簪珥衣飾典質為供王父習而

安焉第云大家女知孝義如此郟人聞之亦云他人家  
無如此者以是府君屢游於外無內顧憂自郟歸後家  
尤貧窘先母在家枝梧內外恒早夜紡績縫衣刺繡以  
易薪米供甘旨奉事王母孝養備至叔父館他處屢召  
還同居時：周其不給每誡不孝以一家共本之義及  
先人孝友相親勿效流俗勃谿岐視骨肉不孝輩守訓  
至今不敢少變不孝兄弟自幼及長教督最嚴事必約  
以規矩稍違即加呵責自四五歲口授以書及唐詩比  
入塾則多誦習矣女兄弟三人教以女工時為陳說古  
義仲適許氏季適李氏皆早寡茹荼守志患難不移今

仲已籲請

旌表季亦將五十矣惟母訓有素故秉禮循義如此至於親戚往來皆中禮節御使臧獲皆有恩誼生平自奉最薄而待人則厚事不能以悉舉自不孝再入都門先母年將八十幸康強無恙不孝心懸異地夢寐不安故於甲戌冬乞歸方冀永依膝下稍備奉養以報劬勞豈謂一朝之間頓棄不孝而逝昊天罔極卒為鮮民慟哉慟哉府君生於康熙七年四月二十三日卒於乾隆十三年八月二十五日享年八十一歲雍正元年拔貢生候選教諭乾隆辛未恭遇

覃恩勅贈儒林郎翰林院編修先母生於康熙十三年正月三日卒於乾隆二十一年正月十一日享年八十三歲恭遇

覃恩勅封安人子男子四人長不孝度庠生前卒娶魏

氏次不孝彌乾隆乙丑科進士翰林院編修加三級娶

劉氏叔季皆早卒女子三人長遠東阿訓導平原張方

載次遠陵縣貢生許三順次遠封邱貢生李渭孫男子

三人度生者二元齡娶顏氏皆前卒皆齡娶黎氏彌生

者一荔尚幼女子五人度生者二遠庠生王中孚陳錕

彌生者三遠平原庠生張予治景州李景端平原庠生

張子定曾孫男子二人 毓發為元齡嗣 毓榮為弼孫女  
子一人皆 齒齡所生以乾隆二十三年戊寅十二月十  
八日申時 不孝弼 奉柩合葬於城東馮家寨祖塋之右  
乙山卒向自府君之卒 不孝弼 泣述行實請銘於黃崐  
圃先生時在辛未之冬及丙子正月先生亦下世痛念  
前言不忍別求謹述先母生平懿德請于知交中  
賢士大夫筆其大端以繼前志之後并詳所未備庶並  
藉以不朽 不孝弼 泣血謹述

賜進士出身儒林郎掌福建道監察御史提督湖南學  
政加一級前翰林院編修年姪毛輝祖填諱

贈承德郎戶部陝西司主事李府君墓志銘

乾隆辛未戶曹李君城丁其先府君艱歸是年冬君之  
季父琬于役京師詣予再拜戚然而言曰兄之葬有日  
矣孤子城謀藏幽之文敢以屬之吾子弼敬諾琬乃言  
曰先兄搢行不愧古人其為人所不及知者多矣自琬  
之幼依兄以居所以撫恤教誨琬者甚至經理田產庀  
治家具織悉必親校所入甚均琬之獲有成立惟兄之  
賜數年來馳驅于外絕無內顧憂亦惟兄之賜今何可  
再得也于是出城所為狀歷陳其事弼于是喟然而歎  
知府君之實有其德也府君天資厚重無苟言笑自幼



有至性父母每以孝子呼之恭兄友弟為鄉人所稱道  
庚戌冬府君弟官戶曹繼母陳宜人居京邸府君在家  
心動即日北上時宜人病數日矣一日晨起謂戶曹曰  
汝兄將至當為羊羹待之以府君素嗜也俄果至舉家  
皆驚兄弟仕于外者必以家事屬府君府君治之如治  
己事戶曹有田歲為水浸地蕪賦困府君視之區畫其  
間縱橫為水道汙萊皆腴又以其暇召族中子弟聚之  
家塾延師教之群從兄弟中孤弱者料理其家禦其外  
侮或為小人所疑構要無慚于己至身膺其患不恤也  
今其從子壩亦官戶曹矣方壩之孤未能支門戶縣令

甚墨重有所覬覦答之不滿所望人或謂府君亦何  
怯惜為府君以壩之孤故不忍減其產也而令遂遷怒  
府君牽致訟事久之乃白然府君卒無幾微介然者  
由是觀之使府君用于時其所設施當有加于治家政  
使當大事遇盤根錯節其卓然有所立可知也特隱而  
未見耳往省陳宜人時舍于逆旅夜聞喧散蓋維之賈  
人資乏不能前將貸其牛與主人爭值府君呼之前與  
數金麾使去後亦頗獲其用城官刑部擢戶曹府君所  
以戒之者反復周至故城有名教公卿僚友間府君先  
世具于家乘嫡母孫宜人繼母陳宜人生母來宜人府

君與琬同母生諱炳字山號山卒年五十有三五覃恩  
勅贈如城官配山氏封安人子男子一人即城官戶部  
陝西司主事女子三人孫男子二人女子二人聘字皆  
名族以乾隆十七年二月二十日葬府君于城南李氏  
先塋之次銘曰山人山合山千山亦山固山結山蓋山此山費  
德潛而耀用顯而藏允矣君子幽然其光惟宅兆藏日  
吉時良既協陰陽卜世延長山故山結山當山良山以山亦山來山以

文學李君墓志銘

君姓李氏諱蓄字季如先世自江西徙德州衛方伯公  
逢時顯于明嘉靖間至僉事公允禎益大僉事公三子  
曰浹是為大令陶菴先生曰濤是為少司寇述齋先生  
兩先生皆以宿學名德為邦人宗仰其季曰潤州文學  
早卒有二子仲曰元瓚康熙辛卯舉人學老文鉅有重  
名于時學者所稱晚聞先生者也晚聞君四子伯曰芝  
字鶴田其季君也歲在庚子君與予同補博士弟子員  
因謁晚聞先生于其家峻骨蒼髯容貌如古人君侍坐  
側長身玉立眉目間英采奕奕是時君年二十四矣晚

聞先生篤志于古枕藉經術為文章孤詣絕俗而教諸  
子尤嚴君少而知學不待督責見者謂有父風父偶有  
不悅君從旁微進一二語輒釋然以解以君刻意學問  
與己志同也無何遭母憂孺人喪哀毀骨立然念父年  
老與諸兄茹哀承顏侍起居飲食惟謹及丁父憂毀瘠  
益甚先是晚聞先生為周易註君頗與焉居憂之暇思  
遂成之以究先志坐是益耗心力疾伏不覺矣雍正戊  
申伯氏卒己酉君元配賈孺人卒手足之痛伉儷之哀  
以及經營喪葬之勞殆不可支又二年而君遂卒矣年  
僅三十有五悲夫賈孺人家世故城父枚候補中書孺

人事翁姑孝處事中禮家數有餉遺每却不受戚某氏  
以富相耀絕之終不與往來有子而夭以痛致疾繼室  
蘇孺人武城歲貢生舉禮女有婦德撫前女甚慈君卒  
以遺命立伯氏鶴田君子應舉為嗣孺人撫之以恩勉  
之以義以克承前緒其子均能讀書有名諸生間于是  
應舉詣予再拜而言曰先君子之喪也無納幽之詞今  
先繼妣見背將卜日祔葬惟先生知先君子幸一言以  
章其遺美予惟初與君交已三十餘年迴憶昔時得謁  
晚聞先生忘年相接比沒而哭其喪又哭鶴田以及哭  
君之喪也今而銘君能不愧然乎銘曰

才不益壽學不延年績學績業與化忽遷式穀貽後于  
子及孫庶克昌熾以光其前佳城既開鬱彼高原徵銘  
納隧幽懿永敷

歲貢生錢復張府君墓志銘 代家君作

歲庚戌秋七月景州之南東林之里錢復張府君卒官  
吏相與嗟于庭曰吾無以式矣士大夫相與嗟于室曰  
吾無與為善矣鄉之人相與奔走行哭曰吾其何依蓋  
府君之德之在人者如是其厚且博也越三歲嗣子丕  
承又卒孫兆鯤幼也迨其壯乃克謀葬先是府君配蘇  
孺人以甲午卒卜地得吉至是合葬于其域而鯤之父  
母從焉府君姓張氏諱慶齡錢復其字先世山東壽光  
人始祖原魯遷于景居東林莊至于府君十世矣祖諱  
文會高郵州學正贈徵仕郎父諱燕譽授鐵嶺縣訓導

辭弗就府君幼承庭訓弱冠補博士弟子旋食餼攻苦  
文事抑、不自耀既而膺歲薦淡于進取日蒸、色養  
迨喪及祭必誠必信無所悔天性醇篤樂于為義生平  
不評人短不言閭閻事喜導人為善諄、懇、惟恐其  
弗及樂施與善處人緩急族之貧不能食壯不能室喪  
不能葬者惟力是視無吝色亦無德容某甲以地質有  
年矣兄弟以是鬪論以義折券與之泣而去某乙遘難  
貸三百金弗克償焚其券勿使知族有公事率先為倡  
建家祠履畝賦金別輸以贊其役癸甲之間歲大侵為  
粥與衣以待餓者活無算又值大疫擇良方合餌以濟

鄉飲禮行為大賓衆帖然服州牧胡公泰旌于門曰善  
人曰儒宗民表曰盛世達尊恂、然辭弗獲也予嘗詢  
諸其鄉無不稱其孝弟自飭已睦族以至賑乏卹患無  
日不以為念年近耄耄益篤不少衰予固知其善在實  
而匪為名勤其始而不倦于終也嗚呼其可傳也夫生  
于某年月日卒于某年月日得銘曰

樂善不倦伊天之篤誦義無窮伊人之淑佳城既即孫  
子之穀銘諸幽隧永貞厥卜

候選府通判樹滋張君墓志銘

代家君作

樹滋張君既卒之某年其子兆鯤克舉其兩世之樞安厝于新阡而以銘來請按狀君姓張氏諱丕承字樹滋某官諱某之曾孫中憲大夫江南安慶府知府諱某之孫某官諱某之仲子年十二為從伯父籤復府君嗣府君諱夢齡世所稱善人張公者也中憲公有三子一孫願獨鍾愛君、雖少已嶄然見頭角不與羣兒伍張氏大姓聚族而居者千餘人居者富仕者顯而府君獨以盛德聞于時既艱于嗣則請諸中憲欲得君以為子中憲以義割愛許其請由是君為府君子府君既茂于德

又督教君以義方而成其才君內則事嗣父母得其歡  
心外從族中諸賢者游薰陶磨礪卓然成器人固謂錢  
復府君之德鬱而未伸其將于君之才而光顯之耶歲  
△△水利營田事起君即揀選當事者以為才有所任  
輒效益委以事効力五載議叙得府通判加二級吾觀  
造物者之生才皆不偶然既生之其有所豎立得以表  
見于世則遇也枯柏豫章自其小已有梁棟氣其終用  
之唯所遇不幸而厄于雪霜摧于風雨無以終見其才  
亦唯所遇君之遇其不幸耶于是吏部將以議叙銓用  
君而君竟卒矣生卒云：配秘氏故城某官秘公女有

婦德事翁姑相夫教子治內政皆中禮法後君幾年卒  
子兆鯤女三人孫△人葬以△年月日君卒之歲君弟  
近光及兆鯤從予游鯤時尚幼近光時：為予道錢復  
府君之德及君之才之可以施于世者君之卒也予悲  
之于鯤之請不可以不為之辭銘曰

德有所貽斯以載才有所就奚以躡即安其室保世滋  
大

文學張雲峰墓志銘

君姓張氏諱隆字雲峰先世居山東壽光縣明初遷景  
州之東林自始遷而下九傳至修于公以明經為三原  
令配廬孺人生君及弟嶷君弱冠補博士弟子為增廣  
生有文名修于公游宦于外俾君督家政以治復以  
其暇習舉子業丁卯試京兆罷歸戊辰遘疾卒年二十  
君少有異才在諸生中為鄉先達所器重丁卯之役  
見其文者皆擊節歎賞既報罷亦不以屑意第時勤  
于所業卒以自刻苦致疾蓋質素孱弱故也疾既亟執  
弟手泣曰死生命也但念父母遠在官署長辭膝下一



恨事耳以君之才使少假以年當有所成就觀其將沒  
惟以父母為念言不及他事孝子之情可見矣而不獲  
祿其命也夫取劉孺人有婦德既寡茹藥飲水苦節自  
矢事舅姑孝修于公罷官里居宦橐蕭然時出奩中物  
佐之再經喪葬皆如禮法君之將沒也謂弟嶷曰吾子  
子孫為嫡長不可以無後弟有子即嗣我然君弟又卒  
無子比其病乃立從弟之子維塏為君後維塏將以乾  
隆十二年某月某日葬君及孺人于先塋之次而來請  
銘蓋距君之卒六十年而孺人之沒亦十餘年矣悲夫  
銘曰

才與行觀其倪摧而折孰忘之子承家歸其室昌爾後  
獲永吉

候選州同張九峯墓志銘

景州張氏之居東林者族巨而多賢其上世自山東壽  
光來傳九世有以明經為三原令者廉聲著于時諱某  
字修于娶于盧氏生二子長隆早卒其仲為九峯君諱  
嶷候選州同知自修于公以上諱某者君祖也諱某者  
君曾祖也往者余舅氏孫峩山先生以文章名天下余  
讀所為修于公墓志每慨然想見其為人既而往來棗  
林與張氏賢者游自修于公諸弟若姪時共杯酒則  
稔聞九峰君之行矣已從長者過君家置酒為歡觀其  
言論丰采固心識君為古之淳篤人也後十餘年歲在

丁卯予官京師君嗣子躍龍狀君生平介予友香圃屬予銘君之墓香圃者君族孫張之賢者也狀曰君素穎異好讀書能通史籍修于公令三原君兄弟留持家政每以勤儉所積往佐在官費修于公罷歸則君兄前卒君左右奉養能得歡心居喪盡禮無或隕越其持已務敦古處重名節不屑隨時俗趨走生平寡交游然怙爽好義歲時伏臘視親友之困乏者出粟周之荒年憊諸貸者券又嘗置義學以教親族之子弟居鄉做司馬公家法為條約其自奉務崇儉樸為鄉人所重此豈非古之淳朴而篤厚者也君兄既早卒君以兄長子不可

無後將以己子嗣之而後謀葬事卒不克如志病革乃取從弟子二人一以為己子一以奉兄嗣與兄同日葬君承修于公清白之後謹身節用克立門戶語張氏者往、屈指于君子次君生平回憶昔游感慨繫之矣惟是菘山先生志修于公墓其文章流傳人口予不敏于舅氏無能為役今先生墓木將拱而銘君者乃屬之予予于此盖有所歎然于中而願不得辭也配蘓氏王氏皆前卒葬以某年某月某日嗣子躍龍孫某銘曰考行惟古事惟質佳城鬱、卜則吉吁嗟張君居此室

副貢生候選教諭梁君墓志銘

自古文章之士抱其所得以自鳴其業非不工也砥躬慕義行副乎其言而不得志於有司卒鬱鬱以老者豈人之所為耶是有命焉矣予始應童子試則識梁君景裴君於是時為名諸生久矣及予年益長與里中諸賢雋角逐君亦時預其間諸子雖英絕然為君屈者屢矣君既以文章有名與魏峻菴任素修兩孝廉李星門進士師事盧夢山先生先生審於評隲品題皆不爽獨君不獲舉、又不及正額僅貢於成均懷其所得不一遇於世終老死几案間豈非命哉然君負其文章不欲居

人下每酒酣耳熱慷慨激昂有不平之感其不得志則  
非人之所為也君五歲失怙母陳孺人苦節撫孤孺人  
泣君亦泣止乃止人皆異之及居喪哀毀盡禮雍正初  
元 詔天下舉節孝君具疏孺人事實於有司然胥吏  
持之不得上今海寧陳相國巡撫山東諮詢疾苦君發  
憤為書千餘言上之陳公惻然大書勁節遺芳旌君之  
門而嚴檄各屬官吏趣上民間節孝狀於是皆得報聞  
君之力也應試濟南與魏君某偕值大疫魏病且困同  
行者委之去君嘆曰朋友可棄耶獨視飲食湯藥不去  
比竟試還質衣衾買肩輿載魏君而已步行盛暑勞瘁

不以介意其他事不可勝書、其可傳者君教授生徒  
善於訓誘多所成就課二子尤嚴皆鬱為名士次者今  
年二十餘十三經皆能默誦庶其有以成君之志娶經  
氏賢明有婦德能操內政其母老而無子迎養於家曲  
盡孝謹其卒也殯葬皆盡其心先君一紀卒年四十八  
實雍正甲寅七月十一日君諱文度景裴其字號鶴程  
別號達夫其先蔚州人有官衛守備者遂家德州曾祖  
諱國標州庠生祖諱廷珠順治辛卯舉人臨清州學正  
考諱允謀早卒君有子二人軒翥州學生鴻翥附生即  
能讀十三經者也女一人遠附生陳鳳梧孫一人惜羽

孫女一人君卒以乾隆丙寅八月四日年六十有一葬以丁卯月日墓在河西之大屯軒翥兄弟既卜得吉而後合葬始予與君為同學戊午之後予舉於順天而君試本省主司得君卷晚置副榜：發謂君曰非不知子吾無如命何矣因嘆息不已自是再應舉終不遇當得教諭不及選遂卒軒翥請銘於予：惟君之行誼有過人者其文章誠工然不過是可悲矣乃為之銘曰文宜遇而若或尼之行則高而命不可知嗚呼梁君而已於斯

賜同進士出身江南新陽縣知縣張石屏墓志銘

乾隆己巳之八月十一日前進士知新陽縣事張石屏卒於姑蘇其喪既還予往哭之而慟：石屏之不當止於斯而不可復作也石屏性仁厚幼恂：然讀書能強記弱冠補博學弟子員甲辰中鄉試又十年成進士謁選得新陽令新陽疲邑政煩賦重俗敝民偷石屏之往也人或謂其不能曰吾盡吾心焉耳既抵任以慈為質以慎為明以勤為功以誠為化浹歲而得其民心民張某被竊捕執其隣趙王戴頤四人為盜而蔡某寄贓石屏視其跡不類以其徵詰捕：不能答皆得白民姚成

賢者沒而有遺產點者構其母誣其婦而鬻其產以訟  
即訊則將講而分其遺石屏廉得之怒曰可令羣蠹飽  
而孤孀泣耶悉置諸法民大悅有姦他人女而匿之者  
若姦鄰人婦而匿之者有富家子尚幼其戚為人所殺  
而反繫之者皆察其情而別治之其去官也以前欠未  
完故人咸咎刑之不厲而石屏曰吾固不能也學使者  
校射有墜而踣者趨視之後騎橫衝其間被創甚衆大  
驚執其人以俟閱日乃甦置勿問衆以是悅其仁新陽  
之人於其既沒狀其德而謹誌之時修邑誌未竟將以  
誌諸循良焉且言曰嗟乎予于侯曷諛乎然使侯之德

不見于世則吾邑慚矣嗚呼石屏其能其官矣石屏幼  
而失恃事繼母如母、亦視如所生自幼迄長于子弟  
之事無違焉家素清白無厚殖自石屏之官所以奉父  
母者惟恐不至兄弟戚族友朋咸分奉給之蓋寧為其  
厚而不能為薄者其天性然也其自新陽歸祖道者自  
邑達郡重撫慰之然後去及聞其卒多行哭失聲者訃  
至家聞者莫不咨嗟太息以為石屏不當止于斯也君  
名予介字濟和石屏其號距生康熙 年 月 日年  
五十有一娶段氏子 女一人以 年 月 日葬  
於 張氏自方伯公始大于石屏為高祖曾祖國子

監助教祖中書舍人父東阿訓導諱字具家乘及予所  
為訓導墓志中母董氏繼母則予姊也故予視石屏如  
甥石屏事予如舅年又相若故予知石屏也石屏既沒  
而訓導亦卒前有兩兄其兩弟則幼矣吾姊或有不給  
輒撫几而嘆：介之先逝也于是親戚間乃益嘆石屏  
之不當止於斯也是可銘吾石屏已

旌表節孝文學呂君妻魏氏祔葬墓志銘

乾隆十九年正月七日吾州節孝孺人魏氏卒距生康  
熙四年五月二十日得年九十自初寡至于卒凡六十  
餘年嗣子淇以今二十一年十二月十日奉柩祔于其  
先君子文學君之墓而命予為文以刻諸石嗚呼既貞  
且壽白首同穴孺人可以無憾矣孺人為陽穀訓導魏  
君誠次女十六歸于呂既數年未有子為文學君置側  
室待之有加比文學君卒孺人以身殉舅姑持之勉而  
不死于是立淇為嗣淇伯氏子也時方幼撫愛甚篤比  
稍長教之嚴其事舅姑孝謹曲至喪盡哀葬盡禮論者



以為能代子職稱節孝名實相符無愧也文學君有姊  
適劉氏老而貧其子幼養之二十餘年為之營立家室  
而後歸之幼妹適楊氏者早寡無依恤之如劉沒而葬  
焉貞女齊氏伯氏曾孫所聘未婚守節來歸于呂孺人  
深嘉其志傷其艱苦命洪脩加周恤至于今不替蓋明  
于義厚于德者其大者如此于律婦人守節年逾五十  
者有司以聞下禮官議旌表孺人願斬其族衆謂此  
未亡人分內事何以名為越三十餘年乃卒旌表如律  
孺人嘗命洪圖己之像與文學君木主相對以貽後人  
洪屬弼記其事書諸左方茲銘也其曷敢辭銘曰

搽比金石心如松柏遐年全節允終婦德撫嗣綿後銘  
幽垂實地道安貞貽爾昌熾

奉天府尹焦公夫人馬氏祔葬墓志銘

夫人姓馬氏奉天府尹章邱焦公諱祈年之妻以乾隆二十年十一月二十二日卒于里第之內寢其子廸曾詒曾卜以次年十月初六日奉柩祔墓而請銘于弼按狀夫人為前掌河南道監察御史鄒平馬公諱光之女生而柔嘉嫻于女儀十五來歸善事翁姑稱孝婦姑張太宜人治家嚴動有禮法夫人先意承志事無弗愜性尤勤儉每夜績以佐讀書雍正癸卯京兆公以親年老不欲北上張太宜人命之曰而婦故善事我而往無慮也是歲公提南宮授館職太宜人心慰焉以夫人賢故

及京兆公由翰林入臺諫兼掌教道旋遷府丞改通政  
一歲數遷俄為廣東觀風整俗使三歲而陟尹順天移  
奉天公益思勵操殫精以答知遇卒以勞瘁致疾然始  
終之間則夫人同心黽勉以成其績也嘗謂公居家世  
清白既獲登用願無忘所學及在粵遇有疑難事輒問  
夫人一言立割無不中肯調劑維持蓋與有力焉京兆  
公于兄弟間友愛極篤仲兄出嗣而落其產子孫困急  
夫人以公命名歸同居叔兄早逝遺孤無所依夫人撫  
之如己子季弟尚幼保護尤篤為京兆公納趙氏女愛  
之逾于常未及久而逝每歲上冢必令人酌其墓其厚

如此至其所以御躬治家教子女營婚嫁睦戚族慈臧  
獲有禮有恩不可勝舉距生康熙二十五年正月十六  
日壽七十于京兆公翰林任內恭遇 勅 覃恩封安人

子男子二人廸曾詒曾女子五人適某、孫男子二人  
女子六人曾孫男子二人女子二人 彌 之得見於京兆  
公最早及游京師亦嘗獲侍焉于廸曾兄弟之請不可  
以辭乃為銘曰

德稱姬姜名齊鍾郝中壘所傳于辭無忤同穴此即永  
安靈魄銘諸幽貞昌熾允若

戰君念初暨妻節孝王氏墓志銘

寧津戰子述曾幼失怙母王氏撫之以長越二十餘年

王氏以節孝受旌表其門閭既卒述曾將謀祔葬痛其

父之早世而行誼將泯追惟二十年来聞之母氏傳之

父老刻心鏤骨述以為狀與母氏節孝之言謁予請銘

孝乎戰子志篤表揚心通幽顯將以發潛德彰遺行匪

獨使其母之大節克傳于後可不謂賢乎按狀戰氏之

先為山東黃縣人自始遷以下七世而至尚愛其嗣定

國邑庠生定國生維新維新生訥子五人長曰紹祖

候選州同字念初述曾父也君少英敏不好游戲喜讀

書見古人嘉言懿行往、慨然慕之思效其所為其行  
孝謹謙遜不尚浮華以故見稱于族黨間而昭德膺君  
以家務屬君為家督遂廢舉子業專治家事、無不理  
天不假年一疾奄忽遂使良匹以節聞于世豈不悲夫  
節母王氏庠生作楷女幼閑姆教十五而歸二十一而  
寡伉儷六年有子三月即述曾也自節母之歸戰氏能  
得舅姑心歡為佳婦相夫之道敬而有禮端淑貞靜亦  
天性哉迨其既歿茹哀致誠以婦代子以母代父里黨  
奉為女師不其賢與夫 國家表節之典所以揚特搯  
勵薄俗而節母之行符于令甲既樹坊旌閭又能使人

因其操行而不忘其夫則其所以飲冰茹蘖而教述曾  
以孝者尤非尋常所可及也戰君前葬以某年月日節  
母祔以某年月日及述曾之卜得吉也而謹志之其生  
卒歲月子女之詳具于左方乃為之銘曰

冰雪掾厲蘭蕙折松耶柏耶歲寒節金鑠石爛心不滅  
幽芳百歲乃同穴高原鬱、芬勿歇後者視茲餘風烈

待贈文林郎企初戰君暨配蒙孺人墓志銘

乾隆甲申之春門人戰式曾以需次縣令至京師時相  
過從間語其家事未嘗不誦其母之賢而悲其父之早  
逝也無何聞母病星馳歸比至而母卒式曾痛絕復蘇  
強起謀葬事既痛其母復念其父乃遣使告哀于予而  
乞藏幽之詞惟戰氏之遷寧津也久十一世諱訥贈宣  
武大夫生五子行四諱△字△式曾父也娶蒙孺人君  
賦質英偉個儻不群敦孝友尚信義磊落有古人風願  
善病又以遭父喪致哀自此鬱鬱成疾卒費志以沒  
時式曾年十六思曾十四母方恭人在堂蒙孺人毀痛

之餘以義節哀事姑盡孝教子有方期以成君之志迄  
今二十餘年式曾既有所成立而母遽卒宜其銜恤于  
無已也孺人性明惠自年十五歸戰氏有琴瑟靜好之  
風一家之事無愆于儀夫子既病飲食必親奉衣服必  
自進衆謂戰氏有賢婦也既歿事姑意喻色授皆能體  
之姑女適某氏生女子卜者妄言不利于母姑甚憂之  
孺人撫以為女故無恙也蒙氏家貧孺人之父卒一切  
殯葬皆獨任之猶好儉素平居惟布衣蔬食若式曾輩  
有良師友則酒饌豐潔惟恐不淹留也課之讀書恒黎  
明趨就塾戒逸習勞俾有以慰父于地下嗚呼雖古賢

母何以加焉式曾當得縣令君與孺人將有贈錫之典  
為之銘曰

潛德未耀後將昌婦道代終、允臧佳城既卜同穴藏  
穀爾孫子世延長

盧府君墓誌

吾州盧氏有賢者修行于家見稱于里有善人之目是為穆齋府君諱曰顯曾贈中大夫長蘆運使世滋之曾孫裕之孫河南府經歷道和之長子經歷公豪宕詆諧劇談善飲而府君淳良樂易恂、謹、幼無子弟之過終身有長者之行事父孝謹曲盡小心有所命慄、然如恐弗勝者母某孺人病治者煮藥餌視飲食寢興晝夜不解帶者數十日撫兩弟極友愛經理家務兄弟之間無間言一弟早卒撫其遺孤如己子戚黨間有以困乏告者必有以答其意教子侄有規矩崇尚忠厚勿慕浮



華勿涉凌兢以故二十年来從弟運使公仕宦南北門  
庭赫奕而經歷公一門安于樸素無加于昔亦可謂賢  
矣娶申孺人景州名家女有婦德治家有法接人有禮  
先府君卒孤子蒙卜以某年月日葬府君于塋次使來  
乞銘曰曰昔之行事又幸數曲盡小必有命歟

良其背善汝止行甚飭葆厥美居此佳城以穀孫子  
郡公之孫既南而歸至並味之身于孫也公家定能  
吾世為九有贊者於下千家良歸千里有善入之目  
靈祇其墓誌

旌表節孝朱母張孺人祔葬墓志銘

平原朱子貽燕紹聞將奉其母節孝孺人之柩祔于其  
先君子之墓而乞銘於予貽燕兄弟張出也予於張世  
為姻親而紹聞子坦又從學于予故知孺人事為悉不  
可以辭孺人姓張氏中書舍人天目先生之長女歸日  
照縣教諭朱君蘓亭前岳州通判賓王朱公之次子也  
十五而歸二十有六而寡三十六年而守土之官以  
節孝上聞賜金建坊又七年而卒閱歲而祔卒以戊  
辰四月十二日距生前庚申二月二十日年六十有九  
其發凡四十三年孺人幼而婉淑嫻內則既歸事舅姑

得歡心固以孝稱矣當教諭君之卒其伯氏早亡遺孤  
廷勳弱貽燕兄弟幼小而舅姑年且邁既悲喪子又顧  
念諸孫戚可知也孺人斷以大義不敢以身殉則啣哀  
茹苦盡婦道而撫諸孤而後舅姑安焉遭姑龔安人喪  
哀毀骨立是年叔氏又卒無子孺人重傷親心以季子  
承烈嗣之自是所以事舅者彌勤不懈及居喪哀慟詳  
慎尤無遺憾其節與孝如此朱氏家故饒然孺人自奉  
苦寒素勤紡績不欲自逸教諸子以義方督課諸孫尤  
嚴皆能讀書為諸生曾孫銘之附于學孺人無恙也性  
仁恕好施予卹族人親戚者甚厚邑丞黃君歿于任幼

女無所依孺人撫之以有家普濟院之設命貽燕捐腴  
田六十畝無吝色焉銘曰  
如金如石節不渝也事生送死孝不殊也徵信銘幽婦  
德之模也

曹公側室高孺人墓志銘

曹子九韶之庶曾祖母高氏景州人贈奉政大夫明五  
曹公之側室也贈公有二子長國勲官工部郎中次國  
烈庠生孺人子也國烈子晞子九韶今孺人卒而舉  
葬事以柩于贈公之墓者九韶也贈公之葬既有志矣  
孺人故無庸志而工部子昕以書狀抵于京師曰先庶  
祖母之大有造于我家也其遇苦而德厚不銘無以示  
後狀曰孺人性和而敏事先贈公及璩宜人終身無忤  
叔父既蚤世遺孤晞甫四歲孺人撫而長之不以愛弛  
勞晞又卒九韶幼弱如父其母亦亡零丁孤苦行道嗟

傷孺人含悲茹痛勉力操持外支門戶內將婦孫十五  
年來備極勞瘁迨九韶稍長受室而孺人病且亟惟  
諄以九韶孤子不克成立為憂嗚乎是其心終身未  
或一日稍安也當先贈公時田數萬畝孺人依叔父以  
居裁食六千五百畝惟賦課酬應則不與自先君子官  
行人歷繕部廉潔勞瘁又卧病十餘年產大落減昔什  
五六孺人召昕兄弟而命之曰若父持家政有年夙遭  
蹇難憂患叢集一官積瘁逋負尚多又若兄弟衆拂一  
人耳今為券使所食外尚萬餘畝悉歸若父拂勿得校  
昕兄弟感泣受命一門之內姊行妹嫁咸望依歸親戚

困乏罔不周給皆有始終惠懷在人孺人之仁厚而明  
于大義又如此書又曰子故習知孺人事願詳書之以  
垂永久且視昕兄弟不敢忘孺人德抑使九韶知再世  
孤弱幸有今日者皆孺人維持保護之力而不可不愛  
身修行以慰先靈于九原也孺人生于康熙七年正月  
四日卒于乾隆十年三月十日葬于冬十月 日昕  
與予善也孺人有女適吾州李君庭燦李君又與予善  
也以予所聞徵諸昕之言也信乃為之銘曰  
沒者其昧耶骨月斷視惟利也胡名教之無畏耶  
性于貪者悖也女師高行厚于義也銘之貞石永厥世

也坤道之光亦足以勵也

清故太學生邢君元配張孺人祔葬墓志銘

臨邑邢慄從予遊己卯秋來歷下素衣素冠詣予再拜  
而言曰慄不幸早年失怙依母膝下以長又不幸復為  
無母之人分無生理惟母氏生平賢行恐不顯于後今  
將謀祔葬惟先生幸賜以藏幽之詞悽愴嗚咽不能自  
已：出其兄忉所為狀余觀之其言質而信無世俗浮  
夸冒昧語甚憫孝子之意故為志而銘之志曰孺人姓  
張氏商河人父萬寧里稱善士生而端淑幼工女紅年  
十七歸太學生邢君振統事祖姑舅姑能盡孝謹無違  
事舅早卒事姑數十年如一日姑病卧牀蓐甚久動起

飲食非由孺人手不安也邢君之沒上奉老親下撫諸  
子支門戶理家事井然秩然如邢君在而加謹至于延  
師教子厚幣豐饌迥異薄俗督教子女尤有家法門內  
肅穆無忝舊風不愧婦德母儀也家雖少豐能勤儉自  
奉澹薄而待人則厚親戚隣里下逮奴佃無不稱其仁  
慈故卒之日多哭失聲者卒之前歲姑病愈篤孺人寢  
食不遑神志俱悴及沒哀毀逾常既襄葬事而病三  
三時竟不起蓋幾平猶以孝致疾云生于康熙三十  
五年十一月八日卒于乾隆二十三年十一月十一日  
年六十有一子男子四人長忬次恂次慄廩生次

懽女子二人適

孫男子四人女子二人忬等

卜以 年 月 日祔葬于太學君之墓銘曰

德無愆儀維壹孝且賢言則質沒同穴歸其室昌子及  
孫永獲吉

